

*Pa formacion di nos hobennan*

# SKOA ta introduci 2 proyecto piloto pa aña escolar nobo

**ORANJESTAD** – Recientemente SKOA a anuncia cu pronto nan lo introduci algun proyecto nobo pa e aña escolar nobo. A base di sondeonan haci, a bin diferente necesidad ariba cu nan a dicidi pa atende cun'e.

## EDUCACION SEXUAL

Apesar cu antes tabatin cierto charla cu instancianan manera 'Famia Planea' tabata duna na scolnan riba e tema di 'educacion sexual', esaki awo lo bay forma parti di e curriculum nobo pa e aña escolar, segun Directora di SKOA, Sra. Josette Daal. 'Seksuele Educatie' ta un di e materianan cu lo wordo introduci pa tanto 4de en 5de klas, como tambe pa Ciclo Basico 1 y 2. Esaki ta muchanan aki ta cay den un edad di 11 pa 15 aña. Un proyecto cu SKOA ta haci conhuntamente cu Wit Gele Kruis a base di investigacionnan cu a wordo haci. Otro instancia cu lo forma parti di esaki ta entre otro, e fundacion di 'Famia Planea'.

## MOTIBO

Implementacion di e materia aki den nos curriculum ta pa motibo cu cifranan di CBS (Central Bureau Statestiek) ta muestra cu embaraso hube-nil ta subiendone aki na Aruba. Segun Daal, hobennan ta cu-

rioso pero no tin suficiente informacion pa mira esaki primordialmente como un aspecto di respet. Motibo cual ta haya necesario pa educa nos hobennan corectamente den e direccion corecto con pa trata y comporta nan mes ora ta bini na e parti sexual.

## PREPARACION

Docentenan di scol lo bay atende diferente 'workshop' duna pa profesionalnan cu lo ekipa nan con pa debidamente atende cu e materia aki den nos scolnan. 'Seksuele Educatie' primordialmente kiermen respet. Respet pa propio curpa, respet pa bo prohimo, respet con bo ta papia cu otro-nan y respet pa tuma decisionnan responsabel. Aña escolar 2013-2014 lo cuminsa educa e docentenan riba e materia y si alcanza lo implement'e e mesun aña escolar aki.

## SCOL SALUDABEL

Investigacion cu a muestra cu Aruba a hay'e cu e problema di obesidad, minister Visser a acerca diferente scol pa cu proyecto yama 'Gezonde scholen', Sra. Auguanette Gunn di SKOA a indica. Esaki ta encera informa e muchanan ya di un edad hoben con pa biba un bida saludabel. Banda

di esaki tambe nan ta haya movecion. Gunn ta elabora cu e no ta solamente trata pa muchanan haya movecion pero pa nan compronde e importancia di hiba un bida saludabel y na final di dia ora e muchanan aki bay cas nan tambe por stimula nan may-oran pa hiba un bida mas saludabel. Gunn ta bisa, cu nan di SKOA a cuminsa mira e frutanan caba unda varios di e muchanan aki ta aplicando esaki caba. "Ora nan bini scol no por mira cu nan ta trece nan pan saludabel, nan frutanan y nan yogurt cu ata algo hopi satisfactorio pa SKOA, como tambe pa nos comunidad henter pasobra nos tur kier combati e obesidad cu nos ta confronta cun'e den nos sociedad," Gunn a bisa. Esaki lo wordo implementa na 5 scol prome y despues di un evaluacion 'chance' ta cu lo implement'e na otro scolnan tambe. E prome 5 scolnan ta Paulus School, Casique Macuarima, Maria Regina, Scol Caiquetio y Dominicus College.

## PASTECHI Y REFRESCO

Ya pa e ultimo 5 añanan benta di pastechi y refresco manera antes nos tabata conoce, a wordo prohibi pa SKOA y a substitui esaki pa sandwich-



Directora di SKOA, Sra. Josette Daal.

nan y juice saludabel

## BOOKLISH PLAZA

Otro proyecto cu SKOA ta introduci ta e proyecto di escritor Quito Nicolas cu yama, "Booklish Plaza". E proyecto aki ta uno unda ta motiva comerciante pa inverti den cumpramento di buki cu por uza primordialmente pa scolnan MAVO. SKOA a haya un coleccion bastante amplio cu lo wordo reparti over di e 5 scolnan di MAVO, pa motiva e hobennan pa lesa. Un proyecto cu lo bay tin su continuacion den e aña binidero unda tambe lo bay enfoca riba bukinan pa scolnan primario.